

Ilinniartunut tapiisarneq pillugu Inatsisartut inatsisaat

Kapitali 1

Aalajangersakkat aallarniutaasut

§ 1. Suliffissanut, ilitsersuisarnernut pikkorissaqqinnernullu qitiusumik ingerlatsivinni ilinniartunut pikkorissaqqinnermi atuartunut, Inatsisartut inatsisaanni matumani maleruagassat malillugit ilinniartunut tapersiissuteqartoqassaaq.

§ 2. Ilinniartut pisortanit allatigut ikiorsiissutinik inuuniarnissamut aningaasartuutinik matussutissatut naatsorsuussanik pisartut ilinniartunut tapersiissutissanik pisartagaqarsinnaatitaanngillat.

§ 3. Suliffissanut, ilitsersuisarnernut pikkorissaqqinnernullu qitiusumik ingerlatsivinni pikkorissaqqinnermi atuartut paasineqassaaq:

- 1) Meeqqat atuarfiannit soraarummeernissamut piginnaangorsarnermi (FA) peqataanikkut meeqqat atuarfianni soraarummeernerup naligisaanik, atuagarsorluni pikkorissaqqinneq
- 2) atuagarsorani pikkorissaqqinneq, ilanngullugit sannavimmi tunisassiornermullu assingusumi piginnaangorsarneq,
- 3) suliffeqarfinni sullissivinnilu suliffissanut sungiusarluni atuagarsorani pikkorissaqqinneq,
- 4) atuagarsorluni atuagarsoranilu Danmarkimi højskole-mi piginnaangorsarneq, pikkorissaqqinnermi ilinniagaqalernissamut ingerlaqqinnissaq siunertaalluni, aamma
- 5) pikkorissaqqinneq allatut iluseqartoq, soorlu ilinniagaqalernissamut imaluunniit suliffeqalernissamut piareersarneq imaluunniit periarfissaqalernissaq aammalu Naalakkersuisunit akuerisaasoq.

§ 4. Kommunit ataasiakkaat tamarmik, ilinniartunut suliffissanut, ilitsersuisarnernut pikkorissaqqinnernullu qitiusumik ingerlatsivinniittunut, ilinniartunut tapersiissutinik pisartagaqarsinnaasunut, Naalakkersuisunut angusassanut isumaqatigiissuteqartarnikkut ukiumut ilinniartut amerlassusissaannik tunineqartassapput.

§ 5. Ilinniartunut suliffissanut, ilitsersuisarnernut pikkorissaqqinnernullu qitiusumik ingerlatsivimmi pikkorissaqqillutik ilinniartunut tapersiissutit aammalu ilinniartunut tapersiissutinik tunniussinissaq pillugu qinnuteqaatit, Inatsisartut inatsisaanni matumani maleruagassat aammalu maleruagassat taanna malillugu aalajangersarneqartut tunngavigalugit kommunalbestyrelsimit aqunneqassapput.

Kapitali 2

Taperseeriaatsit

§ 6. Ilinniartunut tapersiissutit ilinniarnermi tapiissutitut, meeqqanut tapitut aamma akiliunneqarluni angalanertut, tunniunneqarsinnaapput.

Imm. 2. Nerisaqarnermut tapit, akiliunneqarluni ineqarnermut aningaasanik ilanngaassisarneq, meeqqanut tapit angissusaat aammalu akiliunneqarluni angalanissamut piumasaqaatit, pillugit maleruagassat erseqqinnerusut Naalakkersuisut aalajangersarsinnaavaat.

§ 7. Ilinniartunut tapiissutit qaammammut tigusartagassaq imatut aalajangersarneqarpoq:

- 1) ilinniartunut 18-it inorlugit ukiulinnut imaluunniit ilinniartunut ilinniartut inaanniittunut suliffissanut, ilitersuisarnernut pikkorissaqqinnernullu qitiusumik ingerlatsivimmi pikkorissaqqittunut 2.225 kr. Ilinniartut 18-it inorlugit ukiullit ilinniartut inaanniittut akeqanngitsumik nerisaqartinneqarput ineqartinneqarlutillu. Ilinniartut inaanni nerisaqarnissaq periarfissaqartinneqanngippat imaluunniit ilaannakortumik periarfissaqartinneqarpat, ilinniartut ilinniartut inaanniittut qaammammut kr. 1.550-inik imaluunniit kr. 950-inik nerisaqarnermut tapinik tigusaqartassapput.
- 2) ilinniartunut 18-it sinnerlugit ukiulinnut suliffissanut, ilitersuisarnernut pikkorissaqqinnernullu qitiusumik ingerlatsivimmi pikkorissaqqittunut 4.400 kr. Ilinniartut taamatut tigusaqartatut, pikkorissaqqinnermut ingerlatsivimmut atatillugu akeqanngitsumik nerisaqartinneqartut ineqartinneqartullu, tamatumunnga aningaasanik ilanngaavigitittassapput.

§ 8. Aningaasartat § 6-imi taaneqartunut procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni maleruagassat malillugit procentimik aaqqiissutissamik ataatsimik ukiuni aningaasanut inatsiseqarfiusunut ataasiakkaanut tamaginnut iluarsineqartassapput.

Kapitali 3

Ilinniartunut tapersiissutinik tigusinissamut piumasaqaatit

§ 9. Ilinniartut atuanggifteqartut, ilanngullugu erninnermut atatillugu sulinngiffeqarneq, ilinniartunut tapersiissutinik pissarsisinnaanngillat.

§ 10. Atuagarsorluni pikkorissaqqinnermi annerpaamik qaammatinik 10-inik sivilissuseqartumik ilinniartunut tapersiissutit marloriarluni tunniunneqarsinnaapput.

Imm 2. Piumasaqaatip tamatuma saneqqunneqarnissaa qinnuteqaatigineqarpat, tamatumunnga pissutsit immikkut ittut pissutissaqartitsippata, Naalakkersuisut imm. 1-imi piumasaqaatip saneqqunneqarnissaanik akuersisinnaapput.

§ 11. Atuagarsorani pikkorissaqqinnermi annerpaamik qaammatinik 10-inik sivilissuseqartumik ataasiarluni ilinniartunut tapersiissutit tunniunneqarsinnaapput.

Imm 2. Piumasaqaatip tamatuma saneqqunneqarnissaa qinnuteqaatigineqarpat, tamatumunnga pissutsit

immikkut ittut pissutissaqartitsippata, Naalakkersuisut imm. 1-imi piumasaqaatip saneqqunneqarnissaanik akuersisinnaapput.

§ 12. Ilinniartunut tapersiissutininik tunniussinissamut piumasaqaatit annertunerusut pillugit maleruagassanik Naalakkersuisut aalajangersaasinnaapput.

Kapitali 4

Atuariartortarnernik nalunaarsuisarnek aamma atuariartortannginnermi ilinniartunut tapersiissutini annikillilerisarnek

§ 13. Suliffissanut, ilitersuisarnernut pikkorissaqqinnernullu qitiusumik ingerlatsiviit ilinniartut atuariartortarnerannut atuariartornermut allattuiffinnik allattuinnissamut pisussaaffeqarput.

Imm 2. Suliffissanut, ilitersuisarnernut pikkorissaqqinnernullu qitiusumik ingerlatsiviit ilinniartut atuariartortarneri pillugit kommunalbestyrelsimut nalunaarutiginnittarnissamik pisussaaffeqarput.

Imm 3. Suliffissanut, ilitersuisarnernut pikkorissaqqinnernullu qitiusumik ingerlatsiviit ilinniartut atuariartortarnerat pillugu kommunalbestyrelsimut nalunaarutiginnittarnissaat pillugu Naalakkersuisut maleruagassanik erseqqinnerusunik aalajangersaasinnaapput.

§ 14. Atuariatunnginnermi imaluunniit atuarnissamut aalajangersagaasumut imaluunniit sulilluni sungiusarnermut isumaqatigiissutigineqartumut inortuilluni takkunnermi, atuariatunnginnerneq imaluunniit inortuilluni takkunneq suliffissanut, ilitersuisarnernut pikkorissaqqinnernullu qitiusumik ingerlatsivimmit akuerineqarneq malillugu pisimanngippat, kommunalbestyrelsi ilinniartunut ilinniarnermut tapiissutini annikillisitsissaaq.

Imm 2. Ikorsiissutini annikillisitsineq imm. 1-imi taaneqartoq nalunaaquttap akunneri qaammammut agguaqatigiissillugu 173,3-it aallaavigalugit naatsorsorneqassapput, tapersiissutit aningaasartaat malillugit iluarsiiisoqassalluni.

Imm. 3. Nalunaaquttap akunnerini aalajangersimasumik amerlassusillit inorlugit atuanngitsoorneq ilinniartunut ilinniarnermut tapiissutini annikillilerinermik malitseqqassanngitsoq pillugu maleruagassanik erseqqinnerusunik Naalakkersuisut aalajangersaasinnaapput.

§ 15. Kommunalbestyrelsi ilinniartunut tapersiissutininut aningaasassanik Naalakkersuisunut utertitsilluni akiliinissamik qinnuteqarpat, kommunalbestyrelsip ilinniartut atuariartortarnerat pillugu paasissutissat Naalakkersuisunut nalunaarutigissavai.

Imm 2. Kommunalbestyrelsip ilinniartut atuariartortarnerat pillugu paasissutissat Naalakkersuisunut nalunaarutiginnigpagit, Naalakkersuisut ilinniartunut tapersiissutininut utertitsilluni akiliinissaq itigartissinnaavaat.

Imm 3. Naalakkersuisut kommunalbestyrelsip ilinniartut atuariartortarnerat pillugu Naalakkersuisunut nalunaaruteqartarnera pillugu maleruagassanik erseqqinnerusunik aalajangersaasinnaapput.

§ 16. Kommunalbestyrelsip ilinniartup ilinniartunut tapersiissutini pisassaani ilinniartunut tapersiissutit annertunaarlugit tunniunneqarsimasut, ilinniartup pisussaataitanani nalunngikkaluarlugu tigusimasai,

ilanngaatigisinnaavai.

Imm. 2. Annerpaamik qaammammut 500 kr. ilanngaatigineqarsinnaapput.

Kapitali 5

Atuutilernera

§ 17. Inatsisartut inatsisaat ulloq 1. januaari 2018 atuutilerpoq.

Namminersorlutik Oqartussat, ulloq 23. november 2017

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut